

松筠樓選集

〈自序〉

蒼松者，冒嚴雪之積壓，猶生氣勃發，益為盤虬；勁筠者，值暴風之毀折，尚骨氣依然，兀自挺拔。憶少時鄉里植竹，多環護古厝，秋冬之際，可抵東北季風之勁厲；至若盛夏，薰風習習，枝極摩戛，另造清涼之境矣！嗣後就讀中壢中學，學堂北側即植幾畝松林，廣莫風至，濤聲蕭蕭，有若獨處雪地寒屋，時自擬於古畫中高士，凝神忘我矣。既與二君子結緣，乃命吾樓焉。

詩集

〈紅葉〉九十三年甲申正月末，遊紅葉少棒紀念館。
叱吒風雲起後山，關西調布斷翎還。如今泰半凋零盡，能不低迴舊影間。

〈旗山嫗〉九十五年十月，過旗山公園。
風清暑氣散，行行到山陲。老嫗語道旁，羨汝相扶持。吾自出閣後，翁行但尾隨。終生莫攜手，三歲娶細姨。見汝夫婦偕，熱淚沿眶垂。勿笑我突兀，觸景感慨滋。若非子媳孝，此世即可辭。遭遇各殊異，聞之微酸鼻。告語寬汝懷，隨分即福地。漸遠唯踽踽，賸遺淒涼意。與妻相將行，山徑蟲鳥鳴。園內松蔭滿，書生正關情。

〈南庄行〉丁亥七月末，從一號國道頭份下匝道，經汶水、獅潭北行。勾留仙山，欲尋先父與家人歡遊蹤跡，而紅塵鼎沸，靈氣已散。轉宿南庄，百年老楓、郵局兀立，令人憶往。
酷暑連旬畏出行，久居蝸室鄙心生。思除濁累開昏眼，詳劃清遊洗世情。再訪仙山塵霧惡，初臨勝景水風清。老楓高竦噓天籟，郵局蕭條百事更。

〈又〉山城氣清，復兼午後大雨，懷抱頓開。館舍密植蓮花，涼風夾馥氣襲人，疑非人間。入夜，望月為山嵐半掩，若倩女窺人，奇絕。
迢迢遠道清涼國，驟雨宜人豈易逢。夢後芙蓉猶卻掩，雲來桂魄自朦朧。浮生才脫娑婆界，今世早離名利叢。偕子靜聆勤紡織，與妻懸想徑三通。

〈又〉次日至向天湖、石壁，擬深入鹿場，因去年風災坍方而不果。
盤屈腸徑下駭矚，崔巍翠屏壓頂來。欸然轉趨平曠場，閒步小徑無點埃。原民村落雖樸陋，群聚笑語剝長豆。黝犬溫馴繞人行，彩蝶嗜蜜百花繁。丘高已憑樹作蔭，嵐清更乘風相迎。湖面向天豁然綠，別築木橋臥虹明。轉下谿谷絕壁插，突兀將擬小三峽。鹿場徑斷搭便橋，旁立釣客餌掛腰。

鉤取幼魚本無質，逕置網箱不輕饒。情知其人已違法，告誡無非惹嘵嘵。
無奈合手學蛇驚，鳴聲長揚上雲霄。清溪苦花亮如銀，日與天地共暮朝。
吾輩皆屬有生客，萬物莫非自逍遙。要知環保即自愛，厚生之道傳迢迢。
此地樂遊開心眼，他日緣續能相招？

〈五二述懷〉 丁亥八月八日生辰作

昔婚尚未久，求職乃遠別。暫去大甲居，甘冒打狗熱。為謀半生安，忍作拂意抉。
南北四百里，戀戀不能絕。一旦得休暇，驅驅急轉轍。下車瞻故里，屋角青青葉。
依稀辨形軀，二子奔叫吾。親我復膩我，行客百憂墮。誰道相見難，長聚亦莫果。
將別妻小挽，欲隨勢不可。眼見影迢遙，呼喚聲漸消。淚眼成迷茫，登車益淒涼。
人生迫無奈，何日脫苦腸。六歲鬱中過，遷居願終償。聚首頗珍愛，際此天倫張。
兩兒少穎異，青年頗飛揚。相約奔上衢，首府齊翱翔。欣渠志得遂，余復入上庠。
苦讀歷六載，勤修不敢怠。勉成博士業，纔脫沈淪海。回首二十秋，惘惘夢中浮。
此生若輪轉，能無任行休？

北歸省母，南部大雨，至中部方霽。旋後輪怪聲作，恐生意外，下台中市區
修繕，夜已闌，無助之至。幸得樓姓女指引，終獲熱心技師修繕。九十六年
丁亥八月十日記。

不辭豪雨阻歸程，百里迷茫險逆橫。陡現清明方自喜，繼聞磨嘎轉生驚。
遍尋諸廠巡修斷，偏賴微熒診治精。平地復馳腸內熱，誰言人世少真情。

〈人事有感〉 丁亥五月。

載簾南來不計年，康成未到馬融閑。羲之信誓終辭宦，袁紹無謀屢退賢。
隨意浮雲何罣礙？識機鷗鳥自高翾。當從海道成歸隱，能學謝安終不還？

〈孤菊〉

一枝黃菊望風開，誰解失根隨地栽。無意苦爭南陌豔，故園蕭瑟待歸來。

〈思故居老母〉 丁亥重陽前夕

長欲挂冠懷耦耕，祈兒挺出尚營營。高堂八秩肌膚槁，遊子五旬鬚髮更。
庭外枯枝傷盡落，草間蟋蟀苦微鳴。故居衡宇千山外，自古天倫一夢驚。

〈憫為卡債自殺者〉 丁亥九月

生年本苦短，奈何不顧惜。路人未經歷，何能會窘迫？昔年多苦役，薪酬未足積。
家家訓勤儉，但圖三餐適。廿載蓄積盈，老少有餘帛。安居尚未已，微現侈靡跡。
行庫諷國人，莫厭消費頻。八荒流通貨，經濟賽三春。少年沉優裕，未教理財津。
行樂先勞動，埋下卡債因。尚未攢薪水，在學現荒侈。成家不更絃，享逸仍脫軌。
常年錦玉食，借貸莫知止。貸息累如山，門疊催款紙。清債實無力，奔走眾不理。

政府爲緩催，訂約延後抵。救火慢添柴，豈能免燒燬。致令意疏懶，欲振心還弛。索債甚法曹，手段如利刀。東搗宅院物，西潑漆如濤。指顧角隅兒，天涯何處逃？父母怖欲狂，相擁唯哀號。夜半餘啜泣，闌干床沿濕。世路行已斷，計定起收拾。顛顛心膽寒，旅館權棲安。日出購木炭，日暮歸自殘。誰問房客事，管理實亦難。疑久敲門詢，門破不忍看。黃泉多行客，人世添餘酸。聞此長歎息，寄言有情官。銀行發卡濫，早應盡剷剷。制定監管法，即斷劣行奸。教化勝刑獄，慎莫啓貪欲。不勸歸業心，那能起流俗？

〈傷大崙國小老榕〉憶幼年暑假，常偕鄰童以土泥和樹乳，製為橡皮擦，差堪代用，諸童皆溺於此。老榕陰翳，歲月無痕，猶眷眷於懷。惜晚近已為新任校長斫禿，為之一歎。丁亥九月記。

不記何年此樹旁，無憂溽暑賴陰涼。攀高取汁誰辭後，坐地揉膠眾解忙。懵懂年華如過隙，昂藏枝幹本無疆。突如橫被無情手，一夜童心盡斫光。

〈黃葉〉小學日式教室已剷去，另起高樓矣，唯大花紫薇乃葉落吾前。飄然落葉映黃鮮，勾我動心生愛憐。歡笑童年何處覓，猶持一片認從前。

綸兒復考回母校物理所，以詩賀之。時九十六年丁亥十月。得意欣然失意驚，此心千古復誰更。堪疑不覺屐牙折，豈若存真且自鳴？

伊朗乘客飛抵加拿大探親，老母咫尺候客室，然以語言隔閡而阻於海關半日，憤激衝突，竟為航警以電棒擊斃。熱心婦女曾欲助之而不得，哭訴真相於記者前。時九十六年丁亥十一月。

飛航萬里會親娘，留滯關衙怨氣長。助者關懷言遠闊，闖人冷漠棒高揚。還疑倒臥形裝假，誰料翻身魄早亡。螢幕之中聲淚下，文明其實最炎涼。

〈小車歎〉丁亥年，氣候變異，十一月颶與季風齊肆虐，復值油價共菜價飆漲，苦不堪言。

大內高官備議庭，農漁凋弊不安寧。野鄉謠詠無輕信，堂廟良謨自合聽。五塊青蔬單把價，三千排氣小車型。萬民愁斷盤殮白，肉食者謀宜不經。

〈梅山行〉丁亥十一月

梅山同名乃異區，南橫數過未覺殊。佇立仰視兩山夾，興來偶憩形神蘇。間行山徑掇仙楂，轉聞谷澗暗囁嚅。幾叢黃樹添秋色，半山梅花香有無。空明隧道崩已斷，高懸吊橋接兩岸。兀立橋頭風袖捲，溪谷峭深起驚歎。奇絕將名小魯閣，巖上高低山村亂。怪想村人何苦辛，遺世獨立當有因。昔日原民抗倭寇，忍離平地與險鄰。久處即成安樂所，不思他徙甘淡貧。遍植梅花應有意，凌霜冒雪終不易。回首尚覺氣殊勝，破我宿昔等閒思。

〈拾荒嫗〉九十七年一月十五日

瑟瑟寒風掩百草，蜷居小車歸便道。一行車陣忽蝸行，緩過瓶頸眾煩燥。
爲有一簇厚紙堆，似行似止似徘徊。趨過反視是何人，老婦板車牽復推。
掙牙顰面顴骨顯，衣裳垢膩色難辨。負重千斤拖不動，蹣跚還似車倒轉。
忽覺兩行淚在面，一時鼻酸不知泣。古有賣炭折臂翁，今興尙儂拾荒風。
遭遇古今何相似，今人何讓古人窮。賣炭猶得取中利，折臂攙扶尙有童。
路旁紙板人所棄，滿載能計幾文銅？身老尙將幼孫養，無孫誰人可送終？
卻看往來盡華轎，英俊美人相調笑。暴走縱橫作雷鳴，賸塵殘煙猶迴縈。
太平豈當是今日，異日能辨今太平？

林君培榕榮退，為詩賀之。君之祖居地在泉州市惠安縣，近年多往省親。時
丁亥臘月末。

天教同儕究典墳，漫漫二紀轉煙雲。隨時進退存風骨，偕世浮沉老血筋。
別有覃思文字理，常能罵鬼是非分。海隅當設陳蕃榻，便向涓州數會君。

春節返鄉，次日風和雲散，家晚輩侍慈母出遊，訪龍潭三坑子。古厝一老叟
出晾酸菜，母門生張佩文老師時同遊，乃趨問名姓，竟同出一祖，此青錢第
即其祖厝也。何其可歎可喜！復上小坡漫步，老母八秩晉六猶能小行，兒孫
笑樂何如！九十七年歲次戊子元月十一日記。

北返密雲籠，寒霖過夕空。龍潭山路轉，古厝水田中。
晾菜存鄉俗，循名認祖公。高堂行腳健，子媳沐春風。

〈聞汶川地震〉時九十七年五月

中州錦繡地，夢魂想華胥。永懷先君語，馳想在詩書。前年終成行，江南誇有餘。
蜀郡一何遙，緣慳蘇李居。汶川驚霹靂，中寮曾經歷。傷亡數萬人，離喪倍苦辛。
昔日已不堪，今日當呻吟。島民捐輸力，精誠感巴國。天涯亦骨肉，共濟一時逼。
無爲褊狹憂，盡棄甲子仇。關山不足畏，共祈萬年庥。

〈戊子七月，家族偕遊太平山，日眺人間，夜觀天象，萬里晶潔，星流如意。
其一〉

曲徑鮮人車，林象高愈光。濃霧開復合，豁然抵山莊。水雲環山腳，有意幻帝鄉。
遠眺正無著，忽爾窺大荒。此地亦紅塵，區別緣心盲。

〈其二〉

入夜雲氣散，眾星何離離。憶昔好觀覽，寒夜不少衰。今夜銀漢闊，牛女還相思。
流星愜人意，祖孫競開眉。夜闌何不寐？天屬共此時。

〈奉家母遊百吉隧道〉九十八年己丑元月二日

直北陰雲天際張，翻山脫棄見晴光。新修大道何平闊，細築斜蹊自靜涼。
遠觀紅塵疑故里，親臨謐境是仙鄉。笑言迴盪春風路，黃蝶還來趁暗香。

〈嗣轉遊大溪，家母遊興未已〉

重到小城尋壑丘，溪聲未改鬢毛秋。喧騰群眾驅寒冽，狹仄偏攤給腹餒。
兒輩何須憂路遠，高堂猶且樂清遊。桃源苦覓皆堪笑，即此生涯豈外求？

〈詠系館道旁桃花心木〉時九十八年四月

嘉樹陸沉盤古期，每隨梅熟點華枝。參天偉幹憑誰賞，探鼻微香只獨知。
刀斧不夭緣未識，紅塵欲遠詎違時。西園落蕊知人意，應散芬芳入我詩。

二子遊學臺北多年，今夏，得閑家居。值余生辰，欲致糕餅祝壽，會莫
拉克颱風來襲，為詩止之。時九十八年。
今朝母難念劬勞，孺子可教堪譽髦。知命不煩求餅餌，樓前風雨已如濤。

二日後聞小林村滅村

生靈塗炭骨埋川，暴雨傾盆山落巔。無補民瘼終碌碌，自知今夕定難眠。

綸兒南海巡弋，臨行與余辨冬星。時民國百年庚寅近春分。
行役何須歎苦辛，誰能宗慤作高鄰？男兒躊躇當今日，仙島徜徉復幾人。
細數參旗除歲晚，閑看冥海度春辰。極南一至稱奇遇，待汝歸來當具陳。

詞集

〈望江南〉九十五年八月，挈家遊寧、蘇、杭、滬，賦詞五闋。

龍蟠處，成敗可咨嗟。俯看鍾山江故繞，低摩石馬路還斜。日暮暗流霞。 臨
江面，橋塔望天涯。艤岸巨輪裝卸促，掣風華轎往來奢。依舊見風華。

〈又〉無錫太湖作

湖面廣，隱逸喜平波。機熟范蠡垂餌釣，緣來白石譜梅歌。風雨有漁簑。 船
艦穩，也擬執干戈。三國城高風浪急，吳王殿裡瑟琴和。梁甫倩誰哦。（無錫今
建三國電影城）

〈又〉過虎丘而不入，緣地陪之故。

佳麗地，先考舊勾留。遠覩虎丘尖塔攢，空留池劍小山愁。只賸夢中遊。 人情陋，誰識有陰謀。偽託導遊名勝地，誑欺引入賈家樓。中有利頭抽。

〈又〉遊獅子林

舟車困，迢遞到蘇州。湖石依前千古秀，獅林還若故人修。園主已他流。 重暑退，池畔傍荷舟。掩映翠陰鴛半睡，閒評書壁跡殘留。妻子共吟謳。

〈又〉先父昔日與友黨夜半泛舟遊西湖，船家為安全計，多覆舟於岸。

西湖夜，土俗覆扁舟。偏趁夜深偷轉鷁，巧逢清桂恐驚叟。操槳盪幽幽。 當年事，高興語還留。塔內許仙猶戀戀，山前蘇柳故悠悠。遙憶思難收。

〈風入松〉九十六年丁亥仲秋，經成大校園，見幼兒園師生來遊，一父老獨遶西門，為余道往事。嗣會平南、忠智於茶肆。二人自祖居地歸來未久，為言一二。臨別，諷余且自優遊。

為尋舊約到南瀛。一路古林橫。榕園初到盤根錯，幼兒過、嬌軟啼鶯。悄悄西門兀立，惇惇父老低憑。 此間幸得兩書生。茶肆樂閑評。迴翔蜀鄂前生定，為詳說、遊學心情。不管臨歧途遠，依依尚有叮嚀。

〈臨江仙〉九十七年戊子正月初十，偕綸兒、綱兒重訪指南宮大雄寶殿，頗憶昔日求學此地之情。依蘇軾調作此。

三十年前登此殿，樟山撲面青青。驕陽依舊照禪庭。兩廂羅漢立，睜怒遣人驚。 春暖重遊霜兩鬢，堪歡二子隨行。少年還似舊時身。從來英氣在，笑看正崢嶸。

〈又〉繼搭纜車

纜懼懸車行墜落，更吹料峭春風。景奇飄忽到貓空。茶亭傳笑語，香韻沁人胸。 山徑閑尋空舊跡，劉郎又到何從。低頭卻見檠芽叢。清明彈指到，相約再從容。

〈滿庭芳〉九十七年霜降後，歸鄉探母，送妻北上與會。送罷，往尋舊跡，不復可辨。轉謁古塔先父靈，亦不果，悵惘何似。

華驛空迴，荒村漫駐，斷徑煙草都迷。纔知天命，鄉曲景全非。河岸高林密竦，循垣壁，殘瓦依稀。東園橘，餘香未散，松鼠尚攀枝。 神迷。空悵望，酸眸易滿，羸足妨移。奈樓寂人單、遠魄難追。橈上閒僧晝臥，重闌閉、祭拜心違。金風起、庭蕪立盡，淒惻望天西。